

流珠歌

葛仙翁修鍊外丹經二十二處未成復於江西閭皂山修內丹
成真遂作歌曰流珠流珠役我形軀奔馳四海歷覽羣書披尋
不悟情思若愚焚徧金石燒揭汞珠貲財蕩盡拊膺長吁吾年
六十功效躊躇賴師指授元炁虛無杳冥中起恍惚中居真陰
真陽一吸一呼先存金鼎次認玉爐離火激海坎水升虛玉液
灌溉洞房流酥天機真露萬類難如真人度人要大丈夫天長
地久同赴仙都念茲在茲語吾記吾